

高 鶴 年 居 士

名山遊訪記

下 冊

提起精神行得，
脚跟把定立得，
源頭尋着坐得，
放下萬緣臥得，
如是，來得去得，
，餓得凍得，萬
物靜觀皆自得。

金山楞伽小隱題

上海佛學書局印行

名山遊訪記

上 下 兩 冊

中華民國二十四年五月初版發行
中華民國二十五年八月訂正再版

每部定價大洋五角
(外埠酌加郵匯費)

著 者 高 鶴 年 居 士

校 訂 者 許 止 翁 居 士

出 版 者 佛 學 書 局 代 沈 彬 翰

印 刷 者 國 光 印 書 局

總 發 行 所 上 海 佛 學 書 局

分 發 行 所 佛 學 書 局 分 局

一、上海：多特絲司脫路
二、上海：新民路國慶路口
三、上海：望平街有正書局
四、長沙：玉泉街七十號
五、杭州：西湖龍翔橋
六、北平：西安門大街
七、福州：下南路廿四號

分 銷 處 各 埠 佛 經 流 通 處

南嶽遊訪記

壬子年八月十七日。由湖南湘潭縣（與湘鄉湘陰稱三湘清中興名臣多出此）往南嶽。十五里湘河口。河通湘鄉縣。十里雙板橋。十里古塘橋。沿途盡是產米之鄉。鄉人多豐富。十里上星橋。遙望南嶽諸峯。隱約雲表。十里沙鋪。十五里景市。住寓。是時正當南嶽香會之期。千百里外朝拜者絡繹不絕。飯舖客棧。全賣素菜。家家門首。設有香案。通宵達旦。行人川流不息。惜所稱者非南無阿彌陀佛。而稱南嶽司天昭上帝。安邦護國大天君。不知天界仍在六道輪迴中。我輩縱禮天帝。亦當發心請帝念佛也。二點鐘時。月明如晝。卽起行。廿里花市鎮。東方發明。經屠店。聞豬聲猛叫。余

心酸如醉。腿軟不能前進。入飯店內稍息。急念阿彌陀佛。爲殺者懺罪。被殺者消災。憶山谷詩云。我肉衆生肉。名殊體不殊。惟恨無力施救耳。此去上山有二路。一由後山上祝融峯。余由前山登。東向十五里石埧。一路峻嶺崇山。茂林修竹。十五里茅蓬子。十里福田鋪。過午街。旁有老者談話。云人於顛沛患難之際。善用一言化解。卽是上報四恩。下濟三有。十五里白雲峯。五里蝦蟆洞。十里南嶽街。衡山在湖南衡州府衡山縣。府縣皆以山名。山南盡衡山縣境。西入衡陽清泉縣。北入湘潭善化境。袤跨長沙衡州二府五縣之間。回雁爲首。嶽麓爲足。東南二面。以湘水爲界。西以蒸水爲界。北以新樂江爲界。嶽頂祝融峯。至縣治六十里。至長沙二百七十里。嶽爲南幹之山。自岷崙發脈而來。由蜀入黔。迢遞九疑。連絡五嶺。突起七十二峯。上如車蓋。遙望如陣雲盤紆。八百餘里。其峯高峻者五。而祝融爲最聳。九千七百三十丈。上有十洞。十五巖。三十八泉。二十五溪。沿湘千里。湘水九向九背。歷代皆尊爲南嶽。嶽市東首祝聖寺。進山門。左右桂樹。正逢花開。香飄雲外。知客師迎入後廳。是晚安息。南嶽諸

刹首推祝聖。清規嚴肅。家風峻美。十九日由大殿等處參觀藏經樓。有海
方丈後西首羅漢堂。石刻五百羅漢像。至後園林木森森。內有塔院數處。上有地藏
殿。乃淡雲長老靜室。適長老外出。內住念佛僧七八人。有善因師招待。中有僧年八
旬以外。鬚髮如銀。名安靜。余問法臘多少。答阿彌陀佛。問貴處那裏。答阿彌陀佛。問
用何工夫。答阿彌陀佛。又問到此幾載。答阿彌陀佛。據云。該僧專修淨土。如救頭然。
不說雜話。不用雜心。可謂山中僧寶。世間導師。仍回寮房休息。相傳寺有猿知入定。
鵝慣聽經。未見。午後謁嶽廟正殿。重簷高七丈二尺有奇。內外圓石柱七十有二根。
房室百有六間。左包四觀。住道士。右圍六寺。住和尚。專爲接待香客餐宿之所。正殿
爲和尚道士公共之殿。禮別。仍回祝聖寺。二十日。淡雲長老歸。邀余至地藏殿。午
餐。有俗客曰。是非煩惱。不離其門。如何是好。淡老答。惟願叢林以無事爲興盛。山門
以耆舊爲莊嚴。煩惱以忍辱爲菩提。是非以不辨爲解脫。等語。二十一日。大善寺
主人超有。設齋招余。與僧俊諸師前往。見殿閣輝煌。構造一新。超公云。得意處論地

談天俱是水底撈月。拂意時吞冰嚼雪。纔爲火內栽蓮。空也法師曰。一杯水便具四海水味。世法不必盡嘗。千江月總是一輪月光。心珠宜當獨朗。齋畢告謝而回。時覺頭痛身酸。午後稍好。閒步於藥師殿。晤可當師。乃久住茅蓬者。余問大師住山如何境界。答云。終朝行藏林下。不以俗塵爲念。二六時中行住坐臥。頭頭是本地風光。處處是當人自己。二十一日。早冷後上頂。善因師引道。三里石坡。好似天梯。上剷曰。雲程初步。曰直上南天。經玉版橋。報信嶺。忽見蛇吞蝦蟆。余心不忍。如救。蛇動瞋心。不救。蝦蟆傷命。阿彌陀佛。奉勸大衆勿造殺業也。九里普濟寺。三里半雲庵。巴巴嶺。又名兩路口。十里鐵佛寺。內供鐵佛。里許丹霞寺。普潭住持招待。有香客問如何能成佛。潭云。身負何物。客答香袋。潭曰。放下便成佛。余等稍息。辭行。寺左有觀音洞。右有文殊洞。五里湘南寺。卽南天門。則安師住持。寺前下望嶽廟。五龍獻珠之形。故天下名山首稱五嶽四鎮。今登南嶽。峯巒秀峻。有特拔千仞之勢。二里獅子巖。巖如獅子相似。巖下有廟。廟內有洞。洞住有僧。里許上封寺。殿房數十間。全蓋鐵瓦。方丈法

輪首座性明迎進飯畢送入當家室住上封在祝融之陽隋大業中立寺夜烈風怒號溪聲驚人五鼓起身上望日臺觀日煙霧四塞渺無所見再上禮舍利塔草木叢深下有朝陽洞內無人居一叢寒樹樹高大者約七八尺謂之短松皆拳曲臃腫膠枝下垂冰雪凝綴回寺早冷畢方丈首坐並客僧數人同昇祝融峯頂無林木四面陡險非常飛鳥難到有時狂風人難立足有殿三間石牆鐵瓦俗呼老殿中供南嶽大帝尊像背坐思大祖師像對面壽佛像余敬禮旁有廂房三間亦鐵瓦石牆乃法輪和尚與首座所募修再上登祝融峯衡山秀甲天下遠睹蒼翠冉冉出雲際神靈之萃聚處也龍魚河圖記云衡山神姓丹名靈峙胡宏詩云祝融峯高天更高太空人世如牛毛風雲萬變一瞬轉紅塵奔走真徒勞仍回上封午後遊高台寺昔羅念庵先生讀書處並有先生手植古松數株俗呼念庵松下觀音巖有洞住二僧西行三里觀音洞進內有一僧端坐於中睜眼云南嶽深稱我心純白石勿黃金泉聲响撫伯栞有子期辨此音余作禮出西向里許羅漢洞相傳昔羅漢修道處住有一僧

與之談道。伊云若能就一身了一身者。方能以萬物付萬物。還天下於天下者。方能出世間於世間。余因天晚。禮辭而返。經會仙橋。今圯。奇險難過。至虎跑泉。見泉水洶湧而出。仍回上封住。夜一點鐘時。獨往祝融峯敬禮。禮畢。休息於蒲團。二小時。憶古詩云。禪宮寂寂白雲封。枯坐蒲團萬慮空。心定不知天已曉。忽驚身在月明中。通宵香客不絕。至曉東方吐明。紅日上昇。頃刻間赤輪湧出。金光灼灼。日照山河。影沈海底。人世奇境。固不數數遇也。再上最高處。覽洞壑之幽邃。俯泉林之隈奧。歸途遇諸師迎來。飯畢下山。由南天門西向約二里許。陰巖小徑。異常陡險。人迹罕至。草頭零露。忽然足滑。滾下數十丈。幸攀樹枝。並未受傷。直下三里。松林之間。有巖。巖洞內深約三丈餘。闊約二丈零。極寒。非強健之人難居。昔懶殘禪師修道處。故名懶殘巖。相傳師種三百六十芋。日食一棵。李鄴候讀書山中。嘗於中夜參師。師取煨芋分半予之。囑云勿多言。領取十年宰相。後果然。蓋師能前知也。橫下數十步淨瓦巖。巖下有洞。有老道問余云。君游歷山川。是何原因。答云非爲別事。乃爲參尋知識。決擇生死。

無常迅速。生死事大。遇善知識。爲增上緣。發明已事。尋師訪道。爲出苦海也。言次。已到火場。五里觀音寺。進內稍息。住持道行頗好。專修淨土。左上兜率寺。右下己公巖。巖前茅蓬三間。住有二師。苦志淨修。二里許。磨鏡台。丹鳳啣書之勢。藤蘿蒼翠。洞壑幽深。上下流泉。清碧可鑒。有禪房十餘間。前有海岸和尚。宗教皆通。今住得悟。廣修苦行。室後七祖塔。據云。金棺用鐵索懸掛於鳳口。七祖卽南嶽懷讓禪師。姓杜。金州人。唐儀鳳二年降生。十五往荊州玉泉寺。依弘景律師出家。通天二年。受戒於嵩山安和尚。詣曹溪參六祖。先天二年。往衡嶽。住般若寺。開元中有沙門道一。卽馬祖也。在衡山常習坐禪。師知法器。往問曰。大德坐禪圖甚麼。一曰。圖作佛。師乃取一磚於石上磨。一問磨作甚麼。師曰磨作鏡。一曰磨磚豈得成鏡。師曰磨磚既不能成鏡。坐禪豈得成佛。一曰如何卽是。師曰如牛駕車。車若不行。打車卽是。打牛卽是一言下。如飲醍醐。自此開悟。大宏佛法。天寶三年。圓寂於衡嶽。諡大慧禪師。最勝輪塔。禮塔再行。嶺上林間稍息。見松鼠花眉大尾黑背白腹。其行如飛。里許天柱峯。上無竹木。

飛禽罕集。怪石如削。峻嶒陡絕。險不可登。諸峯環繞。滿澗碧流。足以滌慮洗心。下有羅漢洞。最奇。若無引導。覓不可得。南去約半里許。講經台大石一方。相傳慧思禪師說法處。旁有虎跑泉。一生巖。西向百餘步。福巖寺。進客堂。知客淡塵招待。茶別。寺中遊覽一週。舊名般若寺。陳光大元年。慧思禪師創建。師武津李氏子。示衆曰。道源不遠。性海非遙。但向己求。莫從他覓。覓卽不得。得亦不真。傳有唐太宗御書經卷。今無。清乾隆間。賜藏一部。殿房數十間。見壁上巖玉森書贈海岸和尚詩云。幽澗松陰冷。炎荒雪意新。十年餘結侶。一笑看時人。冰石三生影。風雷萬里春。南台好遺址。與君晚爲鄰。訪首座明誠。乃寄禪長老師弟。博覽藏教。研窮心理。伊云。久聞居士遍歷名山。所爲何事。余答宿業繫纏。大事不了。參訪高人。洗我孽因。答曰。眞爲大事不了。切忌有名無實。務要死心蹋地。外息諸緣。內心不動。後堂果海曰。若能如是用功。日久月深。因緣時至。業障頓脫。如開門見山。撥雲見日。何愁不了。語畢。隨參玄妙上人。諸人隨至禪房。上人靜坐。年約七旬以外。身着補衲。道氣逼人。知客向前云。有江南某

居士特來親近。老人答請進。入內見禮。上人招呼坐下。余問上人居山如何境界。答優游靜坐野僧家。闔寂安居實瀟灑。問日用何功。答行也禪。坐也禪。語默動靜體安然。問安然之時。真妄如何。答不求真。不斷妄。了知二法空無相。無相無空無不空。卽是如來真實相。問實相如何。答取不得。捨不得。不可得中。只麼得。問海岸老人行何功。行。答宗亦通。說亦通。定慧圓明不滯空。知客問。人遭人謗。是何原由。答。從他謗。任他非。把火燒天徒自疲。我聞恰似飲甘露。銷融頓入不思議。觀惡言。是功德。此卽成我善知識。問。謗人猶可。謗法如何。答。欲得不招無間業。莫謗如來正法輪。余問宿業牽纏如何解釋。答。了卽業障本來空。不了應須還夙債。良久又云。說者易。行者難。言行相應方可談。上人氣概與衆不同。據云住此三十餘年。未曾下山。真不可多得。斯寺古有十景。三生共話詩云。一個心而三個身。非真非假是何人。如今始得團團處。不盡情談嶺上春。次日告別。至明月峯前謁三生塔。乃慧思禪師之塔。相傳師於此歷修三生。故名三生塔。塔院四面皆山。門前池塘。碧水蒼山。開慧性。疏鐘幽磬。破

迷津。里許南台寺。晤澄清和尚。談及石頭西遷禪師。端州陳氏子。曹溪得度。遺命謁青原禪士。復入南台之東。有狀如台。乃結庵其上。頓悟心宗。時號石頭和尚。後有藏禪師示衆曰。南台靜坐一爐香。終日凝然萬慮忘。不是息心除妄想。都緣無事可思量。游大殿藏經閣。有日本僧梅曉六休所贈日本藏經一部。藏主培植。昔在天童相見。今遇於此。仍回丈室閒談。主人云。從靜中觀物動。向閒處看人忙。纔得超塵脫俗的趣味。遇忙處會偷閒。處鬧中能取靜。便是安身立命的工夫。是晚養息。攷此寺乃衡嶽之名刹。石頭之古蹟。梁天監特建。歷代興衰不一。近歲荒頽。淡雲長老始謀興復。並修祝聖清涼等寺。及各處修繕。無不有求必應。此老緣法亦屬希有。二十六日早。辭行。里許石頭禪師塔。羣峯四立。形如蓮花。塔安於心。禮別南行。遙望岫嶺。峯竦立千百丈。連接霄漢。戴延之西征記。岫嶺山上有神禹碑。大禹治水登而祭之。因夢玄夷使者。遂獲金簡玉字之書。得治水之要。攷衡嶽七十二峯。其最尊者五。祝融天柱紫蓋石廩芙蓉也。而祝融爲最尊。祝融者。卽古祝融氏。號赤帝。葬於衡山。自祝

融下歷諸峯。前後左右均有徑路可達。由南天門至上火場。讓祖塔傳法院南台寺。可歷覽雲居赤帝諸峯之勝。由南天門至毗盧洞。過潤泥塘。可歷覽芙蓉諸峯之勝。由南天門至下火場水濂洞。可歷覽紫蓋諸峯之勝。由上封取徑老龍池。至方廣寺。可歷覽蓬萊岫嶺諸峯之勝。祝融之前爲峯十有六。祝融之後爲峯十有三。其左其右。南有回雁。北有嶽籠。共十九峯。合爲七十二峯。下坡十二里。由嶽廟回祝聖寺。二十七日早。與善因師往朱陵洞。俗呼水簾洞。七里至六角亭。坐觀飛瀑。水出山腹。垂流與珠簾無異。但見其水而不見洞。亦有三疊瀑布。稍息。回祝聖寺。二十八日早。辭行下山。三十里。衡山縣城外清涼寺。淡老因公在此。淡老云。我是專信淨土法。華云。若人散亂心。入於塔廟中。一聲南無佛。皆共成佛道。散心稱佛。尙成佛道。况深信切願。何疑彌陀不接引乎。並說雲開堂。乃昔韓文公祈雲開處。文公宿嶽寺。有詩云。火維地荒足妖怪。天假神柄專其雄。噴雲泄霧藏半腹。雖有絕頂誰能窮。我來正逢秋雨節。陰氣晦昧無清風。潛心默禱若有應。豈非正直能感通。公信天信神信妖。

怪而不信佛。是見小而不見大。見末而不見本。見邪而不見正。適形學識之陋也。次早搭船。淡公送至碼頭。曰。君當爲苦海之慈航。余曰。願公爲化城之導師。合掌而別。

由南嶽回滬道經湖南遊訪略記

九月初一日。由衡山縣抵株州。（此處有鐵道達省城）隨登岸陸行五十里渡湘河。至湘潭。仍住海會寺。初二日早。乘小輪午抵長沙。假住武廟。當家妙觀。頗重道德。與僧度師同往佛學會。適會長吳安舟張子宜先生。常靜可愚上人。惠敏法師。正經理會務。惠云辨事不易。瞻欲大而心欲小。智欲圓而行欲方。僧度曰。念念猶如臨敵。日心心常若過橋時。經坡子大街。市面繁盛。行人如織。擁塞難行。初三日。出南門。觀白沙井。二井相連。其水白色。味厚美。方長數尺。深約尺許。水深二三寸。用瓢取水。晝夜不絕。回游玉泉山。爲省城香火最勝之處。初四日。出西門。過湘河。經沙洲。再渡。舟中有人言。貪是逐物於外。欲是情動於中。君子愛財。取之有道。言次到岸。七里嶽麓山。是日霧氣濃厚。遙望不見。頃刻雲消。清景如畫。近觀洞壑蔚秀。山色幽奇。又一境矣。山麓岳麓書院。國中四大書院之一也。內設學校。左至聖殿。李渤海碑。尙存。右路登山。空谷幽巖。樹深竹密。別有天地。里許萬壽寺。晉建。大殿供佛。左右羅漢。

晉時大鐘一架。知客導引。觀古佛巖。右有白鶴泉。御書亭。經響鼓嶺。相傳行人下足。響如鼓。里許岳麓峯。登頂四顧。白光如水。彌滿空際。進五岳殿。一覽而出。依山橫行。里許松蒼竹翠。可以留客。隱逸林中。無榮辱。道義路上。泯炎涼。里許禹王碑。摩崖刻字。建有石亭。絕頂遠眺。江城如畫裏。野氣接長空。游客談。山林雖是勝地。縈戀便成市朝。心地苟無染着。欲界亦是仙都。亦知道語。原路下山。約十餘里。進城。仍住武廟。初五日出城。乘划船。百八十里蘆林潭。時近二更。過輪船。風狂雨驟。初六日。仍如故。船至堤口。不能出口。瀟湘之水。北入洞庭。遙觀洞庭湖中。波浪滔天。白日無色。下午風減。出口。湖中大半淤灘。曲折難行。五點鐘。至岳州。湖中君山。林茂境幽。饒有仙景。山海經云。洞庭山。卽君山。一名湘山。內有小山十二。狀如螺髻。方六十里。上有神祠。相傳爲堯帝之三姑墓在焉。屢著神異。次日抵漢口。由漢口乘長江輪到上海。

十月初十日抵滬。寓佛經流通所。彼時適頻伽精舍請月霞法師開講法華經。法師

與迦陵主人。姬佛陀。黎端甫。皆余舊友。來邀維持道場。不意忽染病魔。志心徹底懺悔。當下頗覺清涼。我人如能真實用功。日久月深。佛念純熟。生死到來。自能抵當也。法華圓滿。正欲入山。諸上善人一再挽留。護持維摩楞伽道場。是時來堂研究者。有狄楚青。方倫叔。劉濮生。朱俊夫。錢履樛。陳子修。鄧心安。沈昭武。宗良師。濮一乘。陳彥通。方重審。劉葆良。魏梅蓀。汪允宗。李小墩。諸君。並有英人李提摩太。莊士敦。梅殿華。莫安仁。諸君。美人李佳白君。俄人冠賽林。諸君。亦來聽講。僧俗士女數十人。法筵頗盛。光陰迅速。經期又滿。遂與黎端甫居士告別。慚愧終日。佛事重重。無片刻之閒。不能靜心參究。自覺反不如前。於是起腳又行。